
OFFERYNNAU STATUDOL CYMRU

2021 Rhif 198 (Cy. 46)

GOFAL CYMDEITHASOL, CYMRU

**Rheoliadau Trefniadau Partneriaeth (Diwygio)
a Gwasanaethau Rheoleiddiedig (Adroddiadau
ar Sefydlogrwydd y Farchnad) (Cymru) 2021**

Gwnaed - - - - 24 Chwefror 2021
Yn dod i rym - - 1 Ebrill 2021

Mae Gweinidogion Cymru, drwy arfer y pwerau a roddir gan adrannau 144B(1), (2)(a) a (3), 166(1) (b) a (4)(a) a 168 o Ddeddf Gwasanaethau Cymdeithasol a Llesiant (Cymru) 2014(1), yn gwneud y Rheoliadau a ganlyn(2).

Yn unol ag adran 144B(6) o'r Ddeddf honno, mae Gweinidogion Cymru wedi ymgynghori ag unrhyw bersonau yr oeddent yn ystyried eu bod yn briodol.

Gosodwyd drafft o'r Rheoliadau hyn gerbron Senedd Cymru o dan adran 196(6)(a) o'r Ddeddf honno ac fe'i cymeradwywyd ganddi drwy benderfyniad(3).

RHAN 1

Cyffredinol

Enwi, cychwyn a dehongli

1.—(1) Enw'r Rheoliadau hyn yw Rheoliadau Trefniadau Partneriaeth (Diwygio) a Gwasanaethau Rheoleiddiedig (Adroddiadau ar Sefydlogrwydd y Farchnad) (Cymru) 2021.

(2) Daw'r Rheoliadau hyn i rym ar 1 Ebrill 2021.

(3) Yn y Rheoliadau hyn—

ystyr “adroddiad ar sefydlogrwydd y farchnad” (“*market stability report*”) yw'r adroddiad y mae'n ofynnol ei lunio a'i gyhoeddi o dan adran 144B o'r Ddeddf;

(1) [2014 dccc 4](#).

(2) Gweler adran 40 o Ddeddf Deddfwriaeth (Cymru) 2019 (dccc 4) am ddarpariaeth ynghylch y weithdrefn sy'n gymwys i'r offeryn hwn.

(3) Mae'r cyfeiriad yn adran 196(6)(a) at Gynulliad Cenedlaethol Cymru bellach yn cael effaith fel cyfeiriad at Senedd Cymru, yn rhinwedd adran 150A(2) o Ddeddf Llywodraeth Cymru [2006](#) (p. 32).

ystyr “asesiad poblogaeth” (“*population assessment*”) yw'r asesiad y mae'n ofynnol ei gynnal o dan adran 14(1) o'r Ddeddf;

ystyr “y Ddeddf” (“*the Act*”) yw Deddf Gwasanaethau Cymdeithasol a Llesiant (Cymru) 2014; mae i “gofal a chymorth” (“*care and support*”) yr un ystyr ag a roddir gan adran 4 o'r Ddeddf; mae i “gwasanaeth rheoleiddiedig” (“*regulated service*”) yr un ystyr ag a roddir gan adran 2(1) o Ddeddf Rheoleiddio ac Arolygu Gofal Cymdeithasol (Cymru) 2016(4);

ystyr “y Rheoliadau Trefniadau Partneriaeth” (“*the Partnership Arrangements Regulations*”) yw Rheoliadau Trefniadau Partneriaeth (Cymru) 2015(5).

RHAN 2

Adroddiad ar Sefydlogrwydd y Farchnad

Materion eraill sydd i'w cynnwys yn yr adroddiad ar sefydlogrwydd y farchnad

2. Rhaid i adroddiad ar sefydlogrwydd y farchnad gynnwys asesiad o'r materion hynny a bennir yn yr Atodlen.

Cyfnod asesu digonolrwydd y ddarpariaeth o ofal a chymorth

3. Rhaid asesu digonolrwydd y ddarpariaeth o ofal a chymorth dros y cyfnod ers cyhoeddi'r asesiad poblogaeth blaenorol.

Cyhoeddi adroddiad ar sefydlogrwydd y farchnad

4.—(1) Rhaid i awdurdodau lleol gyhoeddi adroddiad ar sefydlogrwydd y farchnad erbyn 1 Mehefin 2022.

(2) Rhaid cyhoeddi adroddiadau dilynol ar sefydlogrwydd y farchnad bob 5 mlynedd ar ôl y dyddiad y cyhoeddwyd yr adroddiad diweddaraf ar sefydlogrwydd y farchnad.

Ffurf yr adroddiad ar sefydlogrwydd y farchnad

5. Rhaid cyhoeddi'r adroddiad ar sefydlogrwydd y farchnad mewn fformat electronig.

RHAN 3

Diwygio'r Rheoliadau Trefniadau Partneriaeth

Diwygio'r Rheoliadau Trefniadau Partneriaeth

6. Yn y Rheoliadau Trefniadau Partneriaeth, ar ôl rheoliad 18 mewnosoder—

(4) 2016 dccc 2.

(5) O.S. 2015/1989 (Cy. 299).

“Adroddiadau ar Sefydlogrwydd y Farchnad

Adroddiadau ar sefydlogrwydd y farchnad

18A.—(1) Rhaid i'r cyrff partneriaeth ar gyfer pob un o'r ardaloedd bwrdd partneriaeth rhanbarthol bennu'r trefniadau ar gyfer cyflawni ar y cyd y swyddogaethau adroddiad ar sefydlogrwydd y farchnad.

(2) Yn y rheoliad hwn, ystyr “swyddogaethau adroddiad ar sefydlogrwydd y farchnad” yw'r swyddogaethau penodedig a roddir i awdurdodau lleol gan adran 144B o'r Ddeddf(6).”

Julie Morgan

Y Dirprwy Weinidog Iechyd a Gwasanaethau
Cymdeithasol o dan awdurdod y Gweinidog
Iechyd a Gwasanaethau Cymdeithasol, un o
Weinidogion Cymru

24 Chwefror 2021

(6) Mae swyddogaethau awdurdodau lleol o dan adran 144B o'r Ddeddf yn un o'r swyddogaethau gwasanaethau cymdeithasol sy'n “swyddogaethau penodedig” at ddibenion y Rheoliadau Trefniadau Partneriaeth yn rhinwedd rheoliad 9 o'r Rheoliadau hynny ac Atodlen 1 iddynt.

Statws This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

YR ATODLEN

Rheoliad 2

Materion eraill sydd i'w cynnwys yn yr adroddiad ar sefydlogrwydd y farchnad

Digonorwydd y ddarpariaeth o ofal a chymorth

1. Asesiad o ddigonolrwydd y ddarpariaeth o wasanaethau rheoleiddiedig sy'n darparu gofal a chymorth sy'n cynnwys unrhyw fylchau yn y ddarpariaeth i ddiwallu'r anghenion a nodir yn yr asesiad poblogaeth diweddaraf.

Ansawdd cyffredinol gofal a chymorth

2. Asesiad o ansawdd cyffredinol y gofal a'r cymorth sy'n cael eu darparu gan wasanaethau rheoleiddiedig wrth ddiwallu anghenion a chyflawni canlyniadau personol pobl y mae angen gofal a chymorth arnynt, a'r gofalwyr hynny y mae angen cymorth arnynt.

Tueddiadau cyfredol neu ddatblygol gofal a chymorth

3. Asesiad o'r tueddiadau cyfredol neu ddatblygol yn y ddarpariaeth o wasanaethau rheoleiddiedig sy'n darparu gofal a chymorth a'u heffaith ar ddigonolrwydd, ansawdd neu sefydlogrwydd y gwasanaethau hynny.

Heriau

4. Asesiad o unrhyw heriau sylweddol ar hyn o bryd neu yn y dyfodol i ddigonolrwydd, ansawdd a sefydlogrwydd y ddarpariaeth o wasanaethau rheoleiddiedig sy'n darparu gofal a chymorth.

Effaith comisiynu

5. Asesiad o effaith comisiynu a chyllido ar ddigonolrwydd, ansawdd a sefydlogrwydd y ddarpariaeth o wasanaethau rheoleiddiedig sy'n darparu gofal a chymorth, gan gynnwys dulliau rhanbarthol a defnyddio cronfeydd cyfun.

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn wedi eu gwneud o dan bwerau a roddir i Weinidogion Cymru gan Ddeddf Gwasanaethau Cymdeithasol a Llesiant (Cymru) 2014 ("y Ddeddf") mewn perthynas ag adroddiadau ar sefydlogrwydd y farchnad leol.

Mae adran 144B o'r Ddeddf yn rhoi'r pŵer i Weinidogion Cymru i wneud rheoliadau mewn perthynas ag adroddiadau ar sefydlogrwydd y farchnad.

Mae adran 166(1)(b) o'r Ddeddf yn rhoi'r pŵer i Weinidogion Cymru i wneud trefniadau partneriaeth penodedig yn ofynnol rhwng un neu ragor o awdurdodau lleol ac un neu ragor o Fyrddau Iechyd Lleol. Mae adran 166(4)(a) yn rhoi'r pŵer i Weinidogion Cymru i'w gwneud yn ofynnol i awdurdod lleol neu Fwrdd Iechyd Lleol gyflawni swyddogaethau a bennir at ddibenion adran 166(2), megis swyddogaethau gwasanaethau cymdeithasol, at ddibenion trefniadau partneriaeth. Mae adran

168 o'r Ddeddf yn rhoi'r pŵer i Weinidogion Cymru i'w gwneud yn ofynnol i fwrdd partneriaeth mewn cysylltiad â threfniadau partneriaeth a wneir o dan reoliadau o dan adran 168(1)(c) gael ei sefydlu gan un neu ragor o awdurdodau lleol ac un neu ragor o Fyrddau Iechyd Lleol. O dan adran 168(2)(c), caiff y rheoliadau hynny wneud darpariaeth ynghylch amcanion a swyddogaethau'r bwrdd partneriaeth.

Mae Rhan 1 yn ymdrin â chychwyn a diffiniadau.

Mae Rhan 2 yn ymdrin â pha faterion pellach sy'n ymwneud â'r ddarpariaeth o wasanaethau rheoleiddiedig y mae'n ofynnol eu cynnwys yn yr adroddiad ar sefydlogrwydd y farchnad; y cyfnod amser y mae'r adroddiad yn ystyried digonolrwydd y ddarpariaeth o ofal a chymorth; y dyddiad erbyn pryd y mae rhaid cyhoeddi'r adroddiad a ffurf yr adroddiad.

Mae rheoliad 2 wedi ei wneud o dan adran 144B(2)(a)(iii) ac mae'n ei gwneud yn ofynnol i awdurdodau lleol, wrth iddynt lunio adroddiad ar sefydlogrwydd y farchnad leol, gynnwys asesiad o'r materion eraill hynny sy'n ymwneud â'r ddarpariaeth o wasanaethau rheoleiddiedig yn ardal yr awdurdod lleol, a bennir yn yr Atodlen ac sy'n cynnwys digonolrwydd y ddarpariaeth o ofal a chymorth, ansawdd cyffredinol gofal a chymorth, tueddiadau cyfredol neu ddatblygol gofal a chymorth, unrhyw heriau sylweddol ac effaith comisiynu a chyllido.

Mae rheoliad 3 wedi ei wneud o dan adran 144B(2)(a)(i) ac mae'n darparu ar gyfer cyfnod asesu digonolrwydd y ddarpariaeth o ofal a chymorth.

Mae rheoliad 4 wedi ei wneud o dan adran 144B(1) ac mae'n darparu ar gyfer yr adegau y mae rhaid i awdurdodau lleol lunio a chyhoeddi eu hadroddiadau ar sefydlogrwydd y farchnad.

Mae rheoliad 5 wedi ei wneud o dan adran 144B(3) ac mae'n ei gwneud yn ofynnol i'r adroddiad ar sefydlogrwydd y farchnad fod mewn fformat electronig.

Mae Rhan 3 wedi ei gwneud o dan adrannau 166(1)(b) a (4)(a) a 168 ac mae'n diwygio Rheoliadau Trefniadau Partneriaeth (Cymru) 2015. Mae'r Rhan hon yn ei gwneud yn ofynnol i awdurdodau lleol a Byrddau Iechyd Lleol ymrwymo i drefniant partneriaeth ar gyfer cyflawni swyddogaethau'r awdurdodau lleol o dan adran 144B.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn.